

摘藻堂四庫全書薈要

集部

欽定四庫全書薈要卷一萬五千五百五十一

集部

劔南詩藁卷六十一

宋 陸游 撰

乙丑元日

好在屠蘇酒扶衰把一卮家貧為壽略歷閏換年遲薦
廟須扶拜題門強綴詩惟思買春困熟睡過花時

俗有賣春

困者予老憊思睡故欲買之

元日讀易

伏羲三十餘萬歲傳者太山一毫芒春秋雖自魯麟絕
禮樂益先秦火亡孟軻財能道封建孔子已不言鴻荒
於虞易學幸未泯安得名山處處藏

自開歲陰雨連日未止

江雲漠漠雨昏昏歸老山陰學灌園十里羊腸僅通路
三家鐺腳自成村應時餽飫聊從俗耐久鍾馗儼在門
近縣傳聞頗多盜呼兒挿棘補頽垣

俗有年餽飫之語
予貧甚今歲遂不

能易
鍾馗

枯菊

翠羽金錢夢已闌
空餘殘蘂抱枝乾
紛紛輕薄隨流水
莫與桃花一樣看

又

積雪嚴霜轉眼空
春回無處不春風
欲知造物無窮妙
但看萱根與菊叢

村舍雜興

冉冉年華速昏昏
睡思濃廢書心自愧
謝病客能容雨

急鐘微度溪湍碓自舂可憐燈下影隨處伴衰慵

又

堅卧非由病端居不是齋世情元自薄人事固多乖晨
飯炊稊米宵行點豆黠昔人言可用第一忌安排

徐仲車有

請問于安定先生

先生曰莫安排

又

白首返吾鄉功名罷激昂掃除魔眷屬砭熨病膏肓老
圃勤供菜蠻童解炷香黃昏那用問且喜日舒長

又

粥罷重投枕

晨起粥後
再睡最佳

燈殘起讀書閉門常自得作計

更誰如箭茁白於玉樓花長比魚盤殮有此味勿怪食
無餘

又

遊宦風波惡還家日月長厭煩思病忘避俗欲陽狂絕
意功名會收身翰墨場著書吾豈敢尚可述農桑

夜興

窮巷行人絕高城漏鼓稀
劇談頻剪燭久坐旋更衣
飢鼠衝人過啼鴉冒夜飛
客歸吾未睡孤影自相依

示鄰曲

北陌東阡好弟兄耄年幸復主齊盟
同嘗春韭秋菘味共聽朝猿夜鶴聲
百世不忘耕稼業一壺時叙里閭情
諸孫識字吾真足安用鵬搏九萬程

夢中作

華山數水本閒人一念無端墮世塵
八十餘年老少事

藥爐丹竈尚如新

春雨

倚闌正是受斜陽
細雨霏霏渡野塘
本為柳枝留淺色
却教梅蘂洗幽香
小露蝶粉初何惜
暫澀鶯聲亦未妨
造物無心寧徧物
憑誰閒與問東皇

草堂

幸有湖邊舊草堂
敢煩地主築林塘

辛幼安每欲為築舍予辭之遂止

漉殘醅瓮葛巾溼
挿遍野梅紗帽香
風緊春病那可敵

身閒晝漏不勝長浩歌陌上君無怪世譜推原自楚狂

陸氏舊譜云

本出接輿後

道室

暮遇風山第六爻脩然盡謝俗間交謀生舊買雲三頃
託宿新分鶴半巢露下丹芽生藥壠月明金粉落松梢
睂間喜動君知否借得丹經手自鈔

旅次有贈

黃鶴樓前逢劒客青衣江口見詩人天涯莫起漂零感

物外終為自在身
賣馬求船雖少日
阻風中酒動兼旬
中原早晚峰塵靜
緱月嵩雲要卜鄰

雜感五首以不愛入州府為韻

莘渭二老人耕釣俱白首
功烈在人間如天有北斗
方其未遇時自處固不苟
夫豈邀虛名欲眩千載後
降及秦漢王望古猶培塿
猶能守所聞外物不得誘
君看魯二生亦豈聖人偶
凜然諸儒間人可我獨不

又

山棲天與癖酒復甚所愛雖云慙黃綺亦慕嵇阮輩失
腳落人間二事略皆廢晚節臨雲壑謂此在券內如何
疾屢作大與初意背好山雖在眼動步輒有礙酒戒復
堅持如隄憂蟻潰何以遣餘年閉戶淡煮菜

又

鸞鳩搶榆枋枯魚過河泣鵬鷃九萬里此豈汝所及丈
夫志古人絕世而獨立遠遊馬蹏穿高卧劒鋒澀其初
所抱負固自高業安能與兒曹俛首就維繫君看折

腰趨孰若舉手揖芝老尚可餐修門戒輕入

又

洛水初平時草木充九州禽獸孳育繁與人為敵讐于
時聖人作日夜為民憂思有以勝之食肉而服裘然後
人奠居禾黍歲有秋豈知千載後戕殺無時休一食刀
几赤百味供膳羞豪侈方相誇哀哉非始謀

又

我年甫三十出身事明主狂愚斥不用晚辟征西府蹭

登過錦城邂逅客嚴武十年醉郾筒陽狂頗自許青城
訪隱翁西市買幽圃如何復不遂歸聽鏡湖雨結廬三
間茅泛宅一枝牖天真儻可全吾其老煙浦

自詠絕句

雙鬢蕭條失故青躬耕猶得養餘齡明時恩大無由報
欲為鄉鄰講孝經

又

溪村人有結繩風晚歲身為帶索翁啜粥如蔬茅屋底

誰知也過百年中

又

不淪鬼錄不登仙遊戲杯觴近百年小市跨驢寒日裏
任教人作畫圖傳

又

逆旅門前撥不開先生醉策蹇驢來未言乞得囊中藥
一見童顏且壓災

又

遠遊索手不費糧新米臨時取道傍今日晴明行未好
經旬風雨住何妨

又

一條紙被平生足半盃藜羹百味全放下元來總無事
雞鳴犬吠送殘年

又

平生寧獨愛吾廬何處茅簷不可居晝闕僮奴停接客
夜無膏火罷觀書

又

睡著何曾厭夜長
老人少睡坐何傷
無燈無火春寒惡
破絮麕毳即道場

風月吟

去日如馳衰有驗
萬事惟當就收歛
可憐未與酒相忘
風月婆娑猶不厭
有時清夜行中庭
幅巾藜杖影玲竚
松風十里吹殘夢
蘿月三更照半醒
河傾雞唱吟未已
爽透髮根清入齒
晨光底事不貸人
轆轤汲水啼鷓起

年光

無賴年光逐水流
人間隨處送悠悠
千帆落浦湘天晚
孤笛吟風鄆縣秋
小市鶯花時痛飲
故宮禾黍亦閒愁
久留只恐驚凡目
又向西涼上酒樓

龜堂

莫笑龜堂陋
生涯實有餘
春寒擁重褐
晨飯富藏蔬
薄技雕蟲爾
虛名畫餅如
兒時論語在
敢負此心初

春晴

春如人易老愁與漏俱長酒著多思睡花重直欲狂新
晴乾蝶翅微暖滑鶯吭誰見龜堂叟揔藤送夕陽

閉門

殘髮凋零不滿巾閉門聊得養天真恐傷藥草停除地
為惜松槎禁伐薪獨木架成新略約一峯買得小嶙峋
蕭然便覺渾無事談笑時時過近鄰

又

衰疾厭厭不易醫閉門惟與睡相宜狂曾忤物慵迎客

瘦不勝衣悔作詩數簡隱書忘世味半甌春茗過花時
寂寥終歲君無諠正是幽居一段奇

有所感

世事真成風馬牛細思愈覺此生浮舊交散後知心少
行路難來出戶愁氣節凌夷誰獨立文章衰壞正橫流
魯中狂士今安有淚盡朱門草滿丘

八十一吟

八十古云耄吾今不啻過山程兩芒屨水宿一漁蓑雞

唱劉琨舞牛疲甯戚歌春寒欺短褐將奈此翁何

高吟

食少支撐惟恃粥力衰舉動輒須人誰知造物猶遺漏
擁鼻高吟又一春

湖上作

耳目聰明手足輕應酬幽事未忘情百年日向漁樵過
千里雲從几席生樽酒每招鄰父共圖書時與小兒評
但餘煙水無儔侶堪笑沙鷗欲抗衡

賞花

湖上花光何處尋
朱朱白白自成林
衰年何預傷春事
閒客猶懷愛物心
欲墮每愁風驟起
正開却要日微陰
蘭亭禹廟平生事
一榼芳醪莫厭深

園廬

天假殘年使荷鉏
白頭父子守園廬
四朝曾遇千齡會
七世相傳一束書
物理從來多倚伏
人情莫遣得親疎
功名自有英雄了
吾輩惟當憶遂初

乍晴行西村

堤樹叢祠北煙村古埭南買魚論木盎挑薺滿荆籃積
潦經旬月晴光見二三農功殊可念保麥復祈蠶

書歎

塵甑炊畬粟羸僮策蹇驢自從行巷日直至挂冠餘揣
分元知止求官實抱虛園蔬幸無恙父子日攜鋤

新製小冠

淺醉微吟獨倚闌輕雲淡月不多寒悠然顧影成清歡

新製柝櫚二寸冠

又

柝櫚冠子輕宜髮練布單衣夾辟塵縱不能詩亦堪畫
年餘八十水雲身

書逆旅壁

市遠過三里店孤無四鄰窄纔容一客久或住經旬病
嫗求風藥樵兒餽爨薪人情愈諳熟來往不辭頻

倚樓

曲曲闌干縹緲間
哦詩本欲破除閒
無端又起天涯感
淡墨生綃數點山

又

樓上憑闌小立時
淡煙漠漠雨絲絲
年光日月有佳處
不解春寒偏入詩

小雨

小雨明復閣餘寒去
又來新苔綠砌上
殘杏過籬開垂
老身餘幾逢春心
尚孩江天近寒食
林外過輕雷

書歎

無能自號癡頑老尚健人驚矍鑠翁未向松根藏病骨
尚尋花底醉春風翩翩孤影如歸鶴冉冉流年付斷蓬
曾謁高皇識隆準傷心無復一人同

紹興朝士自周丞相下世獨予尚在

爾

遷雞柵歌

烏雞買來逾歲年庭中赤幘何昂然吾孫初生畏晨唱
家人共議欲汝捐烏窮必啄奴豈憚雞賣將烹吾所憐

貴人賤畜雖古訓物理寧不思兩全舊棲況爾苦沮洳
新柵幸可圖完堅東園稍去房奧遠挾雌將雛從此遷
竹簟朝算有餘粒瓦缶亦自盛清泉啾啾風雨守汝職
瞋膊勿恤驚吾眠

春興

暖靄催桑眼睛光長草心沙平看卧犢密葉聽鳴禽買
酒貧為崇登山病不禁終年惟一褐捫蝨又春深

小園

蕭散遺塵事栽培得小園土鬆花意活林暖鳥言繁
醑供晨鉢莖芹薦晚樽餘年君莫問送老到孤村

二月晦日夜夢欲卜居近邑道遇老父告以不利
欣然從之

夢中行卜居道遇白髮叟一面出苦言戒我棄勿取人
之生實難失腳墮虎口我深感其言解衣奉杯酒豈知
立談間得此直諒友起坐心茫然天闊樓挂斗

新晴

苦雨幾終月新晴喜夕陽扶行呼稚子隨意下茅堂草
茂知麀健巢新覺燕忙興闌歸亦好袖手獨焚香

病中作

苦雨侵衰骨餘寒著敝裘病多辭社飲貧甚輟春遊日
日親蔬圃時時弄釣舟回頭語造物與子兩無求

示子適

敢恨吾生後聖賢六經雖缺尚成編本來堯舜身親見
孰謂丘軻道不傳妙理豈求縫掖外淳風寧在結繩前

此身未死還堪勉更伴吾兒學數年

窮居

羸病無時已窮居只自悲巾偏非雨墊衣弊豈塵緇米
盡時炊稗樽空慣啜醅逐貧雖有賦乞食未成詩

春晚自近村歸

山陰道上柳如絲策蹇悠悠信所之曲水已過修禊集
餘寒不減試燈時貧猶自力常謀醉病不能閒日賦詩
誰道茅簷苦幽獨一鉤新月是相知

開孫滿月

夜夢奇童拜且言今乃幸得生高門夢後一日得開孫
虎兒墮地百獸犇未論頭角與看字但聽啼聲誰敢侮
就令長大未必奇亦作人間孔文舉

小築

西郊小築臨煙汀南山秀色入窗櫺朝鐘暮鼓在何許
乃是會稽山陰之蘭亭堂中老人白鬚鬢手扶藤杖垂
九齡客來不語坐至夕往者絕物今忘形牆隅老雞新

樹柵長號催上東方星老人亦起穿兩屨巖泉漱齒讀
黃庭

春晚歎

一風已快晴微雲復成雨盛麗女郎花坐看委泥土蜂
房蜜已熟科斗生兩股堂堂一年春結束聽杜宇老夫
久卧疾乃復健如許便當裹米糲爛醉作端午

鷓鴣

翩然一鴉升倏爾一鷗下非惟飽殘餘亦可免彈射巡

簷攫脯脩入舍掠膾炙嗟汝無盈厭坐是取驅嚇物情
貴能改一青亦可貫併語黃雀羣勿輕敗吾稼

舍東四詠

疎籬

數掩圍柴荆王維畫不成尤憐月中影特地起詩情

松棚

松棚尋丈地客至共開顏堪笑杜陵老坐思千萬間

盆池

寒溜初通後新荷未長時誰扶大圓鏡為我照鬚眉

小徑

環遶無十步捷行射半之安西九千里自有著鞭時

示元敏

學貴身行道儒當世守經心心慕繩檢字字講聲形吾
已鬢眉白汝方衿佩青良時不可失苦語且須聽

算春

掠面微風吹宿醒送春空有不勝情風煙老盡王孫草

時聽桑間鳩婦聲

又

辛夷海棠俱作塵
鯨魚蓴菜亦嘗新
一聲布穀便無說
紅藥雖開不屬春

又

市橋岸下泛湖舟
雕檻疎簾半上鉤
春事幾何君惜醉
明朝赤幟插譙樓

遊湖至
立夏止

又

祓除已過算春初綵舫相銜十里餘浮蠟喜嘗新店酒
流塵間拂壞垣書

書感

楚些難招去幹魂正令舌在向誰論中分白日歸欹枕
全付青春與杜門凜凜啞人愁履虎區區染指畏嘗鼈
殘年誓報嗟何及虛負明時養老恩

晨起出南堂

曉枕華胥誰喚回下堂拽杖一悠哉啼鴉已逐晨光起

飛鷺初衝宿靄來石路少行生蔓草柴扉多閉長莓苔
身閒亦未全無事檢校黃花幾樹開

春晚小飲

病卧書齋一味慵今年春事又成空
籜龍奮迅風雷際木筆凋零霧雨中
平野草深黃犢健斷溪水長畫船通
小兒偶得官樓酒鱖醢鱠乾一醉同

殘春

江蘆堆盤粬救香山家節物亦窮忙
桑間椹紫蠶齋老

水面秧青麥半黃
語燕似催春事去
遊絲不似客愁長
鄉村年少那知此
處處喧呼蹴鞠場

又

過了清明日愈遲
年華不復在辛夷
誰知綠葉陰成處
正是青天露坐時
茂草滿庭喧鼓吹
嫩湯出鼎試槍旗
衰翁敢作明年計
剗與東君惜語離

聞山步有虎

茆屋穿漏雨送春
村路斷絕虎啞人
采桑鋤麥皆結伴

兒童出門翁媪嗔

久雨初霽

兩月涔涔雨不休今年春近尚重裘
水淡草茂羣蠢怒日出風和宿麥秋
陂壞隄防誰與築市遥鹽酪絕難求
農家辛苦尋常事賣劔方當更買牛

初夏幽居雜賦

雨霽逢初夏胡牀蔭綠槐
半酣方鬼駭假寐忽台小
穗閒簪麥微酸細嚼梅
衰翁不禁老更著物華催

又

過盡一春雨園林氣少和偶然扶柳粟復爾坐盤陀小
草數行字殘花一曲歌公卿非傲汝無奈愛閒何

又

水際閒將鶴林間獨擁琴披叢采香草映樹看珍禽正
使居無屋猶勝突不黔過春差覺健處處得幽尋

又

籬落魚池北房櫳道院東水紋藤坐榻山字素屏風采

藥松岡近投竿荻浦通悠然搔短髮心事寄冥鴻

又

曲曲羊腸徑疎疎麕眼籬渴蜂窺硯水狂蝶入書帷一
枕輕安夢數聯蕭散詩餘生已過足不必到期頤

又

闢地剪蓬蒿何曾歎作勞藥名尋本草蘭族驗離騷北
澗穿籬過南山出屋高回頭看富貴何啻一秋毫

又

修名寧復冀餘日苦無多已歎堂堂去將如寂寂何編
籬護香草埋盎貯清波兒戲君無笑相從且浩歌

雨

家近蓬萊白玉京草堂登望不勝清初驚野色昏昏至
已見波紋細細生殘醉頓消迎亂點微吟漸苦入寒聲
只愁今夕虛簷滴又對清燈夢不成

自閔

主人元是客儒士却成僧垂老貧如昔經春醉未曾蹇

衣身偃僂顧影髮鬢髻忽憶東岡路捫蘿試一登

蔬食

牆陰春薺老筍蕨正登盤野饁元無婦村醕不屬官何
由取熊掌幸免買豬肝猶勝煩秦相綈袍閑一寒

讀阮籍傳

天生父子立君臣萬世寧容亂大倫籍輩可誅無復議
禮非為我為何人

杜宇行

鄉中以杜宇早鳴
為蠶麥不登之候

去年杜宇號阡陌家家聚首憂蠶麥豈惟比屋衣食憂
縣家亦負催科責今年略不聞杜宇蠶收麥熟人歌舞
豈惟襦新湯餅寬隣里相約先輸官

捕虎行

自故歲有三虎出上臯天衣山
谷近者尤為人害捕之未獲

山村牧童遭虎噬血肉俱盡餘雙髻家人行哭覓遺骨
道路聞之俱掩涕州家督尉宿山中已淬藥箭攢長弓
明朝得虎徹檻穽縲絲擣麩歌年豐

遣興

前歲我冠領石渠即今山市醉騎驢目衰書卷研求嬾
心弱詩章鍛鍊疎風雨吾廬嗟獨破齋鹽每食歎無餘
燈前却有欣然處稚子談經屢起予

三齒墮歌

一葉落知天下秋三齒墮矣吾生休詩人未脫紈袴態
尚樂華屋悲山丘蓼花荻葉可以解我憂鸕鷀白鷺可
以從我遊君看貂裘與兜鍪等為岑岑壓我頭豈知石
闌干下買窮筇一棹飄然煙雨舟不須強預國家憂亦

莫妄陳帷幄籌功名富貴兩悠悠惟有杜宇可與謀

龜堂初暑

淪漪一曲遶茅堂
葛帳紗巾喜日長
多事林鳩管晴雨
依人海燕度炎涼
溪枝著子累累熟
幽草開花冉冉香
安得此時江海上
與君袖手看人忙

衰歎

十年三墮齒久矣
歎吾衰疊疊循天理
兢兢到死時窮
空顏子巷勤苦董生帷道遠
餘生趣常憂日影移

初夏閒步村落間

薄雲韜日不成晴
野水通池漸欲平
綠葉忽低知鳥立
青萍微動覺魚行
醉遊放蕩初何適
睡起逍遙未易名
忽遇湖邊隱君子
相攜一笑慰餘生

夜興

鬢毛飽受雪霜侵
一褐蕭條寄故林
簷雨滴回羈枕夢
城笳喚起塞垣心
平生恥露囊中穎
垂老甘同爨下琴
燈燼欲殘看瘦影
不妨袖手坐愔愔

欽定四庫全書

白
言
詩
卷
六
十
一

劔南詩藁卷六十一

謹案卷六十一第二頁前三行莫與桃花一樣看

刊本莫訛黃據宋詩鈔改

欽定四庫全書

總校官庶吉士臣張能照

校對官編修臣裴謙

謄錄監生臣金士虔

欽定四庫全書薈要

集部

劔南詩藁卷六十二

詳校官助教臣謝登雋



欽定四庫全書薈要卷一萬五千五百五十二

集部

劍南詩藁卷六十二

宋 陸游 撰

寄十二姪

東 庚寅吾入蜀西過齊安城雪堂拜老仙眉宇寒崢嶸微
泉尚如昔激激琴筑聲龍蛇入筆力斷石卧縱橫戊戌
奉詔追觸熱萬里程歸途抵齊安歲月浩可驚三日乃
東下鼓角遙送迎安國有老僧元祐初載生蟬聯說舊

事耳目猶聰明徒行就舩別耿耿惻愴情豈知二紀後
汝乃為此行追懷昔遊地未語涕已傾念汝雖並塞二
國方守盟職雖在警盜枹鼓寂不鳴惟當奉法令日夜
撫孤惇官卑俸入薄切勿厭藜羹勇如赤壁戰節若江
水清人誰不汝知況事賢公卿三山與七家相望兩柴
荆歸來講學暇襜褕同春畊

出塞四首借用秦少游韻

北伐下遼碣西征取伊涼壯士凱歌歸豈復賦國殤連

頸俘日逐貸死遣牧羊既服何足讐汝自承餘殃

又

煌煌藝祖業土宇盡九州當時王會圖大小來共球

國初

降服甚衆今茲縛纛下兵力豈不道萬里獻太社裨將皆通

侯

又

符離既班師北討意頗闡志士雖有懷開說常若賠諸
將初北首易水秋風寒黃旗馳捷奏雪夜奪榆關

又

沿邊兵禍結異事古未有爾來閭左起似是天假手頭
顱滿沙場燐火閃榆柳天網本不疎貸汝亦已久

命駕

命駕清晨出射堂筇枝羽扇受微涼鷗將數子窺苔井
桐引新枝出粉牆岸幘影邊茶正熟投壺聲裏日初長
興闌却蹋湖隄去十里山花滿袖香

遊山遇雨

千秋觀前雨濕衣石帆山下叩漁扉鷓鴣苦道行不得
杜鵑更勸不如歸

東籬雜題

終日在東籬清和適此時鶯聲如妬夢花氣欲撩詩愛
客茶新碾畱僧飯別炊流年隨手過不覺近期頤

又

深居遠悔吝簡事養精神曳杖一蕭散待茶時欠伸風
生叢竹嘯露坼野花新自作東籬後經旬不過鄰

又

昨日一花坼今朝一草生
深林鳩婦聒高棟燕巢成熟
果檐間墮殘書枕畔橫
菴居澹無事作意領新晴

又

南陌歸雖久東籬興又新
無求覺身貴好儉失家貧
引水常終日栽花又過春
桃源不須覓已是葛天民

又

溝聲流激激籬影立疎疎
平旦來澆藥臨昏尚看魚
比

鄰怪疎索風月伴躊躇安得王摩詰憑渠畫草廬

書事

本來只道千鈞重看破元無一羽輕
日月光明天廣大不妨獻傲過平生

又

燕雛學母飛初熟梅子團枝亦半黃
塵尾唾壺俱屏去尚存餘習炷爐香

乙丑重五

盤中共解青菰粽，衰甚猶簪艾一枝。
宋莫廢書仍止酒，今年真負此佳時。

又

飛棹中流救屈平，俚歌寧復楚遺聲。
危冠更在門楣上，但覺蕭蕭數與艾榮。

夏夜枕上

卧聽殘更下麗譙，雖非遙夜亦迢迢。
正令展轉無安枕，猶勝龍鍾趁早朝。

石帆夏日

石帆山下雨冥冥
閒岸紗巾憩草亭
單複篝衣時脫著
甜酸園果半黃青
鰓魚無隊依蒲藻
病鶴長鳴鍛羽翎
自笑若為消永日
異書新錄相牛經

又

短棹飄然信所之
茶園漁市到無時
風從蘋末蕭蕭起
月過花陰故故遲
蓴菜煮羹吳舊俗
竹枝度曲楚遺辭
頗聞項里楊梅熟
鄰曲相招莫後期

仲夏風雨不已

南陌東阡自在身一年節物幾番新
鱖魚出後鶯花開梅子熟時風雨頻
冠蓋敢同修禊客桑麻不減避秦人
夕陽更有蕭然處照影清溪整葛巾

幽居

旌節庭下葵鼓吹池中蛙坐令灌園公
忽作富貴家浮生均一閑事過但興嗟
蚩蚩彼何人欲摘空中花牆隅蔬可挽
巷口酒可賒疎懶遂吾性不賣東陵瓜

齒落

昔聞少陵翁皓首惜墮齒退之更可憐至謂豁可恥放
翁獨不然頑頓世無比齒搖忽脫去取視乃大喜譬如
大木拔豈有再安理咀嚼浩無妨更覺羸肩美

雨中排悶

殷殷雷繞村淅淅雨鳴砌禽魚各自適草木亦得意顧
此菴中人老病獨顚顚飯遲每嬾索兀兀方坐睡平生
飽憂患性命已屢試但得過今朝明日可徐議

逆境

步步常由逆境行極知造物欲其成磨礪久已盡芒角
烹煮豈容重發生死到面前猶覺小事於身外孰非輕
出門不必名山去但見風煙已眼明

夜興

脫冠殘髮冷飈颺北斗闌干河漢秋水未有風栖鵲起
亭臯無月亂螢流酒慳僅得時時醉詩退難禁夜夜愁
欲睡不妨還小立一聲菱唱起滄洲

寄題李季章侍郎石林堂

林慮靈壁名字宙震澤春陵稍居後翟公黃鶴得數峯
對客掀髯詫奇秀我行新灘見益奇千巖萬竇雷雨垂
古來豈無好事者根株盤踞不可移侍郎築堂聚衆石
坐卧對之肝忘食千金博取直易爾要是尤物歸精識
君不見牛奇章與李衛公一生冰炭不相容門前冠蓋
各分黨惟有愛石心則同崎嶇宦路多危機凜然石友
人間稀它時樣棹華亭岸更看金窠買鶴歸

流年

冉冉流年迫耄期
心情漸減舊兒嬉
唾壺塵尾已從省
茶竈筆床猶自隨
昨日客招東浦釣
今朝僧約北軒棋
敢將輕健誇鄰里
一笑元知要及時

雨中鋤藥

庭中正苦日卓午
水面忽看雲過西
老子不辭衝急雨
小鋤香帶藥畦泥

自嘲

壯歲耽書廢夜眠
窗明猶在短檠前
如今自笑摧頽甚
卧看兒曹理斷編

世事

世事如今盡伏輸
面能乾唾況其餘
詩才退後愁強韻
眼力衰來怯細書
歛迹已思焚筆硯
作勞敢避把犁鉏
晴空萬里寬多少
一片閒雲足卷舒

悲齒落自解

年運而往君自寬
此生畢竟有衰殘
語訛嚼廢尋常事

只作兒童礪齒看

送十五郎適臨安

求祿亦常事出門寧自由
苦留雖惜別細話却生愁
雨急投村市鐘殘過寺樓
祇應今夕夢先汝到江頭

幽居夏日

茅舍參差煙靄中超然高興與誰同
形骸已與流年老
詩句猶爭造物功
子母瓜新間尊俎公孫竹長映簾櫳
日長愈覺閒無事隱具成書又一通

又

內史蘭亭晚卜鄰永和風月凜如新功名不入閒人夢
詩酒猶關老子身簷淺時時聞霄籟池清一一見潛鱗
正令未逐飛仙去要是巢居太古民

大雨

北窗欲化莊生蝶睡思濛濛栖倦睫川雲忽帶急雨來
萬點縱橫打荷葉坐收爽氣入詩律更借涼颼吹醉頰
壞簷腐瓦凜欲墮積潦中庭深可涉兒愁漏濕廢夜課

婦畏泥塗停早饁老翁自笑獨爾頑更喜煙波搖短楫
思雲門

一身膏脂略瘦盡萬卷簡編如隔生祗欲移家若耶去
亂雲深處聽灘聲

夏夜

散髮荒池上秋聲滿綠蒲
燐飛棄月暗泉語似人呼
學問無新得功名負壯圖
拾薪炊麥飯隨事且枝梧

觀身

欲去浮華累先觀老病身濁醪何負汝淡飯最宜人意
氣隨年往工夫媿日新祇將閒送老虛作太平民

養氣

學道先養氣吾聞三住章屏除金鼎藥糠粃玉函方凜
凜春冰履兢兢拱壁藏高談忘力守此病最膏肓

日用

日用無淵奧其中妙理存但能明物性不必學玄門盡
力扶元氣精思去病根昔人由此道推已及元元

村市醉歸

伏櫪元知免駭機翦翎豈復慕羣飛
坐中客滿知心少囊裏詩多得意稀
小市雨餘尋酒去野橋日落策驢歸
不辭十里行空翠終勝京塵化客衣

夏日感舊

北窗枕簟卧陶翁樹樹鳴蟬葉葉風
睡覺殘書棲嬾架浴回細葛覆熏籠
一藤未遂名山去半卷還驚舊厯空
妄想金丹君莫笑清班曾是長仙蓬

又

五侍仙祠兩挂冠此生略有半生閒
嘯歌雨笠煙蓑底
來往山村縣郭間一粒何當換凡骨
數盃且復駐顏顏
胡塵埽盡知何日不隱箕山即華山

予仕宦屢厯宮祠
崇道玉局武夷佑

神太平
凡五任

又

吳人那慣粟漿酸茶盃聊需舌本乾
身病不堪閒客攪
日長惟憶異書看
流年冉冉誰能駐
長夏迢迢亦已殘

步有新舫君賀我西風先夢上嚴灘

近修小舟訖事
村鄉多來賀

又

獨居無復客嘲邊終日頽然飽即眠護硯小屏山縹緲
搖風團扇月嬋娟桐陰忽見翻雙鵲石罅時聞落細泉
避暑不須河朔飲轉頭即見早秋天

雨後

甘澍慰羣望浮雲還故墟新涼生枕簟餘潤入犁鋤簾
上翩翩鷺蒲新鱗鱗魚素秋猶半月團扇意先疎

東軒

榴花零落滿蒼苔
簷葡忘憂亦已開
湖海片帆先已具
少安無躁待秋來

寄子虞子適

大兒再度吳門秋
小兒錢塘逾月留
恨身不能插兩翅
與汝相守寬百憂
聞鐘時宿雲外寺
待月亦上湖邊樓
但常保此豈不樂
路難悠悠非善謀

寄張季長

髮不勝簪短褐寬每因臨鏡歎衰殘未嘗三日不服藥
雖滿百年終闔棺舊友豈知常阻闊一尊那得敘悲歡
錦官花重應如昔直欲凌風借羽翰

夏夜

鳴蜩斷復續宿鳥久始安觸熱汗沾衣暮夜猶未乾
梧桐獨知秋一葉墮井闌行矣戒碁枰四序環無端

又

落月不滿窗驚鵲屢移樹沉憂少睡眠亦以衰疾故五

更忽作夢立馬青衣渡白首厭山村郵亭憶征步

讀趙昌甫詩卷

蝸廬溽暑不可過把卷一讀趙子詩如遊麻源第三谷
忽見梅花開一枝寄書問信不可得握臂晤語應無期
惟當飲水絕火食海山忽有相逢時

海氣

浴罷來水許適有漁舟橫浩然縱棹去漫漫菰蒲聲海
浸乃爾奇萬象空際生驂驪牧龍馬天矯騰蛟鯨或如

寨大旗或如執長兵我欲記其變忽已天宇清成壞須
臾間使我歎且驚世事正如此何者非強名

村居

舍後盤高岡舍前面平野防盜枳作藩蔽雨篠代瓦

村人

以篠覆屋如茅數家相依倚百事容乞假薄葺耕樵歸共話衡

門下

戒殺

郊居去市遠豬羊稀入饌既畜雞鶩羣復利魚蟹賤暴

殄非所安擊鮮況親見那得屠殺業為客美殽膳餘年
尚有幾過日如露電豈無園中蔬敬奉君子宴

庭中夜賦

流汗沾衣不自支庭中散髮立多時烏烏畫角凌風起
淡淡銀河拂地垂浮玉閒遊元自樂浣花小築亦何疑
東歸萬里君知否要了滄洲一段奇

秋近

石榴萱草併成空又見牆陰莧葉紅茶蘼頗妨千里夢

簾涼初怯五更風
新瓜落冰盤裏
晚燕添巢畫閣中
身健流年供可樂
故人自欠一尊同

歎老

齒墮因廢談
短髮不入把
餘年似殘尊
欲盡不禁瀉
出門見鄉曲
每恨識面寡
往昔同兒戲
累累塚盈野

殘暑得小雨頗涼

午暑不可觸
忽驚如許涼
軒窗雲作暝
草木雨生香
蒲葉先秋實
蟬聲入夜長
自欣無一事
岸幘倚胡床

乙丑夏秋之交小舟早夜往來湖中戲成絕句

橫林渺渺夜生煙野水茫茫遠拍天菱唱一聲驚夢斷
始知身在釣魚船

又

河漢橫斜斗柄低啼鴉掠水未成栖怪生淒爽侵肌骨
船繫秦皇酒瓮西

又

譙門鼓角寺樓鐘一一風傳到短篷喚得放翁殘酒醒

錦囊詩草不教空

又

小市易散無人行
茫茫湖橋惟月明
老夫解醒不用酒
自有千頃菰蒲聲

又

雞頭累累如大珠
紅草綠荷風味殊
天與楊梅成二絕
吾鄉獨有異鄉無

又

城南天鏡三百里
繚以重重翡翠屏
最好長橋明月夜
寄船策蹇上蘭亭

又

酒旆搖搖出竹籬
扁舟遠赴野人期
一天風雨晚來惡
落盡白蓮渾不知

又

七月湖中風露新
臨流閒照白綸巾
荷花折盡渾閒事
老却蓴絲最惱人

又

恰聽殘蟬禹寺門又看新月石帆村後來復有龜堂老
千載猶應此意存

又

娥江道上欲三更垣屋參差閉月明倚柂賦詩無傑思
斷腸分付棹歌聲

又

秋來湖濶渺無津旋結漁舟作四鄰滿眼是詩渠不領

可憐虛作水雲身

又

夢筆橋東夜繫船
殘燈耿耿不成眠
十年未息靈胥怒
卷地潮聲到枕邊

初秋

生世元浮脆
人言七十稀
耄期今已及
氣力固應微
食冷常憂過
追涼每念歸
入秋纔幾日
卷簾換縑衣

又

藉草沾衣露沿溪掠面風
桐凋無茂綠蓮老有疎紅
小
約欵危度鄰園曲折通
新秋得強健一笑莫匆匆

又

初夜月猶淡入秋風已清
螢孤無遠照蟬斷有遺聲
命
薄慙勛業才疎負聖明
青鞵若耶路亦足慰平生

又

兀兀終年醉空空四壁窮
那知雙雪鬢又度幾秋風
高
枕三峰老深衣獨樂翁
騎驢向何許措筆有蠻童

秋陰出遊

遮日雲生忽復收黃鴉鳴喚伴林鳩也知雨意逢秋作
未害山翁竟日遊陌上驛亭雙隻堠煙中漁釣兩三舟
歸遲不是尋詩料秣蹇民家偶小留

杜宇

杜宇雖微禽用意舉世稀念昔春盛時天地皆芳菲杜
宇默無聲不畏百鳥譏東君將促駕乃獨號鳴悲日夜
不肯休流血沾其衣念言身尚存乃使春獨歸飲啄雖

如昔此身當疇依月明抱樹枝敢忘此歔歔雖無精衛
勞區區亦庶幾寄言天壤間勿謂斯禽微

養生

衰病猶弱國地與齊楚隣朝憂羽書來莫畏戎車塵奔
命不敢辭所懼殘吾民羸老正類此日夜憂其身起居
飲食間恐懼自貴珍一念少放逸禍敗生逡巡所以古
達者訓戒常諄諄不死正爾得成真非有神

初秋夜賦

北斗垂欲盡明河淡不流低回半枕夢蕭瑟一窗秋老
益尊儒術閒仍為國憂孰云生死大却已付悠悠

又

炎煇猶未伏清絕忽新秋露氣房櫳冷砧聲歲月道悲
蛩草根語孤燐竹間流聞道河南北飛蝗暗百州

殘年

殘年垂八十高卧豈逃名泥巷多牛迹茅簷有碓聲炊
菰觴父老煮棗脯雛嬰遣戍雖傳說何時復兩京

記夢

環立江頭千萬峰
夢中於此倚枯筇
青冥誰見歎巾角
碧漉閒將洗筆鋒
一卷素書雲笈貯
數升松麩水機舂
正呼鶴駕凌風去
驚覺西山煙外鐘

村飲

白稻登場喜食新
太倉月廩厭陳陳
蕞祠懷肉有歸遺
官道橫眠多醉人
小市孤村真送老
浩歌起舞最關身
鹽醢乞貸尋常事
惱亂比鄰莫媿頻

老鰥

水際山前有老鰥終年無事亦非閒淵源師友簡編上
土木形骸魚鳥間零落斷雲依釣瀨連娟新月照柴關
葵羹稗飯悠然過一飽元非造物慳

對食作

賤士窮愁殆萬端幸隨所遇即能安乞漿得酒豈嫌薄
賣馬餓舩常覺寬少壯已辜三釜養飄零敢道一袍單
飯餘捫腹吾真足苜蓿何妨日滿槃

七月十九日大風雨雷電

雷車動地電火明急雨遂作盆盎傾強弩夾射馬陵道
屋瓦大震昆陽城豈獨魚蝦空際落真成蓋履舍中行
明朝雨止尋幽夢尚聽飛濤濺瀑聲

湖上

三伏無多暑漸微登臨清曉試縑衣風高病木初凋葉
潦退流萍尚半扉白首重來空感昔清尊相屬欲忘歸
猶憐不負湖山處好在平生舊釣磯

欲雨

正苦中天赫日流
房櫳忽復變颼颼
雲生江浦初成暝
葉下亭臯剝作秋
移穴族行憐垤蟻
爭巢婦去歎林鳩
人間寒暑何窮已
碁枰行聞治褐裘

秋懷

少年萬里度關河
老遇秋風感慨多
草聖詩情元未減
若無明鏡奈君何

又

園丁倚架摘黃瓜
村女沿籬采碧花
城市尚餘三伏熱
秋光先到野人家

又

迢迢枕上望明河
帳薄簾疎奈冷何
不惜衣篝重換火
却緣微潤得香多

又

詩如水淡功差進
身似雲孤累轉輕
落葉擁籬門巷晚
一枝藤杖且閒行

食新

龍鍾好在夢中身，刺喜今年又食新。
不用更煩人祝鯁，輪囷瓜瓠是常珍。

予初仕為寧德縣主簿，而朱孝聞景參作尉，情好甚篤。後十餘年，景參下世。今又幾四十年，忽夢見之。若平生覺而感歎賦此。

白鶴峰前試吏時，尉曹詩酒樂新知。
傷心忽入西窗夢，同在哺村折荔枝。

讀書

憶昔年少時把卷惟引睡情遊過日月自咎輒涕泗老
來百事廢却覺書多味豈惟時有得聖域可坐致譬如
入武庫懍懍不暇視淺陋安能名出門但驚喟天球及
河圖千古所共祕幸今發其藏雖老敢自棄

諭鄰人

鄰曲有米當共春何至一旦不相容為善何嘗分士農
堯民皆當變時雍

又

相攻本出忿與疑能不終訟固已奇訟端可窒君試思
歲時鄰里相諧嬉

又

世通婚姻對門扉禍福飢飽常相依忿爭得直義愈非
不如一醉懷牒歸

示小廝

偷閒打睡汝何尤罵詈榜笞我所羞但搢一鞭隨小蹇

不妨村路共閒遊

又

晨興略整案頭書十日庭中始埽除未免丁寧惟一事
臨池莫釣放生魚

劍南詩彙卷六十二

欽定四庫全書薈要卷一萬五千五百五十三

集部

劍南詩藁卷六十三

宋 陸游 撰

秋雨

老火阻餘威，賴此一雨洗。
一雨豈遽涼，涼亦自此始。
陂湖菱芡熟，小市新酒美。
行歌多醉人，驩意溢閭里。
懸知屢豐年，絲穀賤如水。
呼兒具筆牘，作詩識吾喜。

江村

江村一雨喜塵清
隱隱雷車意未平
莽蒼郊原來莫色
颼颼林壑起秋聲
書希簡古終難近
詩慕雄渾苦未成
白首愈悲知我少
從今一技不須名

又

誤著儒冠不更論
白頭且喜卧江村
林深棲鳥逐更噪
埭近過舟終夜喧
病起日惟翻斷簡
愁來時亦倒清尊
自嫌未絕知聞處
尚有僧敲月下門

山行

南出柴門即是山青鞵踏破白雲間旋償酒券何時足
罷諾僧碑盡日閒三尺古琴餘爨迹一枝禪杖帶湘斑
吾廬北望雲煙裏又伴紛紛宿鳥還

天王寺迪上人房五十年前友人王仲信同題名
尚在

綠遶青圍古會稽城東河上古招提已公茅屋曾遊處
渭北山人半醉題暫憩不妨停畫楫幽尋還得杖青藜
舊人死盡惟殘屋竹密雲深步步迷

東窗偶書

東窗終日靜
惛惛消盡平生幻
妄心
秋氣未催羣木脫
老懷先感百蟲吟
屏風疊
邃思廬阜冠子峰
高憶少林安得吾身
且強健
一藤隨處更幽尋

又

萬事何曾有速淹
熊蹯魚腹自難兼
山川置掌猶能取
日月無膠可得黏
稚子幸堪持几杖
老生元自慣齏鹽
清晨臨鏡還三歎
雪領今年無處添

乙丑七月二十九日夜分夢一士友風度甚高一
見如宿昔出詩文數紙語皆簡淡可愛讀未終而
覺作長句記之

客中得友絕清真蓋未傾時意已親枕冷不知清夜夢
眼明喜見老成人河傾斗落三傳漏霧散雲歸雨幻身
心亦了然知是妄覺來未免一酸辛

示子適

翁老兒窮不自支此心幸與古人期勞兼薪水奴初去

典到琴書事可知藥杵無聲工忍病米困可埽恥言饑
餘年有幾須相守萬里煙霄付異時

小雨

赤日炎熇勢未回川雲忽起亦佳哉鴨衝細雨橋陰出
蝶弄微風草際來攆柳不禁朝暮久芙蓉猶有二三開
一年光景煩君看何怪昆池有劫灰

舟中作

遽除作帆三版舩漁燈夜泊閭門邊煙波四萬八千頃

造物推排作水仙

又

山蔬藥苗滿箸香超然下視大官羊更憑語與劉文叔
豆粥從來味最長

漁父

食簞雖薄尚羹藜且喜今朝酒價低一櫂每隨潮上下
數家相望埭東西團團箬笠偏宜雨策策芒鞋不怕泥
應笑漆園多事在本來無物更誰齊

又

數十年來一短簑死期未到且婆娑敲門賒酒常酣醉
舉網無魚亦浩歌片月又生紅蓼岸孤舟常占白鷗波
人間各自生涯別文叔君房媿汝多

讀書示子適

時子適
方敗舉

我生無它營半世隨宦牒讒波方稽天憂與愁相接中
間稍自覺萬事付馬曹告歸幸見聽泊與淡相遭日晏
突無煙垢面有爪痕讀書則未置可笑習氣存造物哀

其窮畀之大耳兒兒亦好古學乃不售有司謂當爲瑟
縮乃如鶻昂藏父子共薄飯忍饑講虞唐豐凶有常數
蔗菜當自力古言不吾欺歲晚於汝食

秋夕

西山樵路隔重雲溪水微風起穀紋暑退忽驚秋漸晚
夜長已與晝中分菰蔣入饌渾家喜碁砑催寒並舍聞
新作篝燈學僧樣與兒同策讀書勲

醉中錄近詩因題後卷

鵝兒色淺酒醺人雞距鋒園筆絕倫滿引一盃書數紙
要知林下有閒身

貧甚戲作絕句

俸祿無餘退即畊市人指笑太清生從今惜取青鞵底
祇向雲邊水際行

又

處窮上策更誰如日晏猶眠為腹虛
飢則卧不起
貧者之常也尚闕

鄰僧分供米敢煩地主送園蔬

又

貸米東村待不回鉢盂過午未曾開
饑腸雷動尋常事
但誤生臺兩鵲來

又

北窗孤坐破三更庭戶無人有月明
數種袴襦秋未贖
羨他鄰巷搗衣聲

又

竈突無煙甑有塵顏垣破屋越溪濱
老鰥狂怪誰嗔責

日日行歌獨賣薪

又

行徧天涯等斷篷作詩博得一生窮
可憐老境蕭蕭夢
常在荒山破驛中

又

讀書但覺慙輪扁補吏非能去箭張
白髮歸為林下叟
固應飢不饜糟糠

又

糴米歸遲午未炊家人竊閤乃翁饑不知弄筆東窗下
正和淵明乞食詩

自做

出仕每辭榮歸休但力耕儉勤貧亦足戒懼禍終輕學
自不欺始智由無事行書紳及銘座勉勉盡吾生

又

經術吾家事躬行更不疑仁常為已任清每畏人知古
訓必三復危途仍十思兢兢死方已寧論迫期頤

雨後極涼

金微未壯長火老尚餘燼可憐茅舍翁瞑目困藉躡蕭
蕭得一雨天氣頗清潤豈惟爽襟靈亦足祛疾疢浮生
日月駛老死纔一瞬聖賢邈不嗣利欲以身徇孰能痛
澡雪此道庶少進閉門君但學妙理天豈吝

醉題

來往人間今幾時悠悠日月獨心知尋僧共理清宵話
埽壁閒尋往歲詩疋馬秋風入條華孤舟暮雪釣湘濱

只愁又踏關河路荆棘銅駝使我悲

秋感

畏塗歷盡百年中老卧窮閭一秃翁
衣杵淒涼常帶月井桐零落不禁風
空文久悔雕蟲技大學方施習射功
佛書云如人習射久久方中萬一死前能少進九原猶可見先公

鼠敗書

雲歸雨亦止鷄起窗既白秋宵未為永
不寐如歲隔平明亟下榻亦未暇冠幘
檢校案上書狼籍鼠齧迹食簞

與果籩攘取初不責侈然敢四出乃至暴方冊坐令漢
篋亡不減秦火厄向能畜一猫狡穴詎弗獲緘藤又蕩
然追咎亦何益情偷當自戒鼠輩安足磔

秋望

千里郊原俯莽蒼三江煙水接微茫
橫林蟲鏤無全葉新雁風驚有斷行
神禹祠庭遺劍珮先秦金石古文章
一尊莫恨盤飧薄終勝登樓憶故鄉

秋夕

浴罷紗巾出草堂一枝瘦杖倚桄榔蟬吟古柳聲相續
月入幽扉影正方頻約僧基秋漸健稍增書課夜初長
亦知桑落宜芻酒太息何時辦一觴

出遊

八月石帆秋聊為汗漫遊本因尋友去却為看山留小
草題僧壁長吟上驛樓月能從劇飲天可寄閒愁高下
從泉品縱橫記酒籌花開遇門入水長信船流骭髀人
雖棄脂韋我自羞此心君不信試往問沙鷗

病中戲詠

八十行加二清秋住故山新涼足眠睡舊疾害躋攀雪
白紛殘鬢梳黃染病顏疲牛卧斜日羸馬噉枯菅貧廢
兒孫學慈生僕妾頑贖衣時已迫貸米歲方難
嘲薄盤飧客笑慳從今謝還往惟有掩柴關

書喜

欹斜古屋枕江干恩賜殘骸許挂冠杵臼有聲聊足食
羊牛識路自歸闌不求客怨陶潛醉肯受人憐范叔寒

兒輩漸還家
暝熱預知燈火話團藥

子龍初自江西歸
子虞亦今冬當罷

官
矣

春畊

去蜀歸吳會真成萬里行
窮通竟安在恩怨兩皆平
文字妨求道
盃觴害養生
餘年猶有幾
買犢事春畊

秋思絕句

煙草茫茫楚澤秋
牧童吹笛喚歸牛
九衢不是風塵少
一點能來此地不

又

榮悴元知豈有常紛紛草木占年光
霜風一掃知何在楚客從來枉斷腸

又

一片雲生便作陰東軒草樹共蕭森
秋風豈必關人事自是衰翁感慨深

又

枳棘編籬晝掩門桑麻遮路不知村
平生詩句傳天下

白首還家自灌園

又

胸次本來容具區
自私盆盎一何愚
片帆忽逐秋風起
聊試人間萬里途

又

黃蛺蝶輕停曲檻
紅蜻蜓小過橫塘
老人未肯殺風景
睡起薰籠重炷香

秋興

節物喜更新清秋最可人徐行曳藤杖小立岸紗巾煙
雨迷衰草汀洲老白蘋鶴巢時託宿猿果每分珍羽客
期燒藥毛人約卜鄰蘭亭故不遠千載見清真

寓歎

五畝煙蕪過半生還山自笑又躬耕春炊不繼兒啼飯
烹飪無方客絮羹遊宦人間身愈困讀書燈下目幾盲
退之已老當更事猶向時人說善鳴

北窗

垂老乞骸骨飄然辭聖朝竹頭那足用桐尾不禁焦短
褐縫練布晨飧采藥苗風霜征雁路燈火衲僧寮隴客
詢安否狸奴伴寂寥北窗鳴落葉愁絕夜迢迢

閒思

睡美精神足心空忽欲輕讀書無定課飲酒不成醒日
日東軒坐時時北渚行最奇烏柏下側帽聽秋鶯

秋光

小圃秋光潑眼來老人憑几興悠哉翩翩蝴蝶成雙過

兩兩蜀葵相背開雨足疎籬引荒蔓人稀幽徑長新苔
貧家竈冷炊煙晚待得鄰翁賣藥回

秋夜思南鄭軍中

五丈原頭刁斗聲秋風又到亞夫營昔如埋劍常思出
今作閒雲不計程盛事何由觀北伐後人誰可繼西平
眼昏不禁陳編得挑盡殘燈不肯明

湖上

飄然世外更何求終日橋邊弄釣舟回視老身猶長物

縱無炊米莫閒愁煙生墟落垂垂晚雁下陂湖處處秋
欲覓高人竟安在又聞長笛起滄洲

湖中有隱士月夜必吹笛人莫有見

者

讀王摩詰詩愛其散髮晚未簪道書行尚把之句
因用為韻賦古風十首亦皆物外事也

我生本江湖歲月不可算采藥遊名山所歷頗蕭散一
逢巢居翁見謂於我館酌泉啖松柏每得造膝款行道
不自力殘髮日已短海山故不遠謫限何時滿

又

仕宦五十年所至不黔突取魚固捨熊挾兔那恨鵲退
歸息厭厭誰敢書咄咄屋穿每茨草驢瘦可數骨秋風
忽已厲落葉襯殘月脫巾坐中庭清冷入毛髮

又

我愛古竹枝每歌必三反孤舟上荆巫天末未覺遠最
奇扇子硤恨不遂高遯荆棘蜀故宮煙水楚廢苑至今
清夜夢百丈困牽挽人生如寄爾勿歎流年晚

又

往歲著朝衫晨起事如橐告歸卧孤村枯淡有餘味閉
門絕外慕自謂真富貴蕭然畢吾生地下亦增氣里翁
應兒女小疾輒憂畏惟窮可賒死我在君亦未

又

萬金築華堂千金教新音不知憂患場著脚日愈深今
人喜議古後亦將議今使汝有子孫聞之亦何心鄧通
擅銅山死日無一簪未死汝勿喜五溪多毒淫

又

往者遊青城猶及二三老稽首出世師數語窮至道妻
子真弊屣棄去恨不早俯仰纔幾時殘骸日衰槁吾兒
有奇骨亦復至幽討金丹儻可成白髮何足埽

又

稚川師鄭君纔及一卷書書大僅如箸度世蓋有餘想
其所論說妙極軒昊初內篇今雖存亦復飽蠹魚我欲
探其原蹇步空趑趄安得插兩翅從公遊太虛

又

隱書有三景字字當力行寸地與尺宅可以久汝生沂
流歸崑虛堅守臨長城一旦告成功河塞黃金成笙鶴
適緱山貂蟬朝玉京即今修行地千古名還嬰

予道室
以還嬰

名之

又

行年過八十形悴神則旺往來江湖間垂老猶疎放滄
波浩無津天遣遂微尚剡溪挂風帆漁浦理煙榜奇雲

出深谷新月生壘嶂興懷晉諸賢誰能續遺唱

又

二十遊名場最號才智下蹭蹬六十年亦有茆一把典
衣租黃犢乘雨畊綠野西成得一飽敢計泥沒蹠住久
鄰好深百事通乞假秋高小瓮香相喚注老瓦

夢行益昌道中有賦

朱棧青林小益西早行遙聽隔村雞龍門閣畔千尋壁
江月亭前十里堤酒舍胡姬歌折柳江津洮馬惜障泥

倦遊重到曾來處自拂流塵覓舊題

自規

忿慾俱生一念中聖賢本亦與人同此心少忍便無事
吾道力行方有功碎首寧聞怨飄瓦關弓固不慕冥鴻
老翁已落江湖久分付餘年一短篷

幽興

蘭渚前頭湖水清了無俗事敗幽情雨淋茅屋隨時補
日射油窗特地明庭樹晚鶯窺戶語鄰園秋筍過籬生

芥菰漸美鹽醯足誰共貧家一釜羹

記前輩語

疇昔見諸老從容聞至言馬非求路寢木豈願犧尊卧
起數椽屋嘯歌三畝園人生正應爾雲夢不須吞

貧居即事

筮易常逢坎推星但值箕老雖齊渭叟窮不減湘纍巷
月鳴衣杵庖煙爨豆萁秋深病良已且復強伸眉

又

地偏人罕到秋晚日猶長病去筇枝贅家貧菜粥香流
泉通藥壠積雨潤書囊欲譜幽居事疎慵久未遑

又

月黑泉鳴樹燈殘鼠穴牆床空圍紙被室靜蕪楓香不
恨言傷直惟憂慙敗剛回頭顧名利百世永相忘

又

米竭炊煙靜村深客屨稀庭除荒宿莽籬落帶斜暉風
惡披書卷鷗馴傍釣磯鄰家殊耐久相伴荷鋤歸

又

意緒喪家狗形骸槁木枝曲肱雖自適縱理固當饑買
絮初寒後畦蔬小雨時窮途何用卜吾道即蒼龜

又

守道常違俗存心不媿天終年饑過半動步謗居前力
倦少行立氣昏多睡眠今宵風月好扶杖到溪邊

自詠

素慕巢居穴處民久為釣月卧雲身經行山市求靈藥

物色旗亭訪異人
高枕靜聽棋剝啄
幽窗閒對石嶙峋
吾廬已是桃源境
不為秦人更問津

枕上作

一室幽幽夢不成
高城傳漏過三更
孤燈無焰穴鼠出
枯葉有聲鄰犬行
壯日自期如孟博
殘年但欲暮初平
不然短楫棄家去
萬頃松江看月明

秋曉聞禽聲五韻

秋曉風露佳
天宇曠以清
鳥雀當此時
意樂有和聲
人

獨不自喜乃欲鳴不平世事雖萬端但可笑絕纓君看
郊與島徒自殘其生

對酒

素月度銀漢紅螺斟玉醪染丹梨半頰斫雪蟹雙螯詩
就吟逾苦盃殘興尚豪閒愁剪不斷剝欲借并刀

又

密篠持苫屋寒蘆用織簾肩柴熟

東坡煮猪肉訣云淨洗鍋少著

水柴頭煙焰不起罨

萼菜豉初添黃甲如盤大紅丁似蜜甜街頭

桑葉落相喚指青帘

示鄰里

古學陵夷失本原讀書萬卷誤元元從今相勉躬行處
士庶人章數十言

重示

篤學仁何遠窮居道亦行能充氣剛大誰蔽性光明家
世艱難業鄉閭昔宿情歲殘相勞苦惟是語春畊

雨夜起行室中

老疾逢秋體自輕披衣暫起繞床行隙風不斷燈將滅
簷雨如傾階欲平鰥叟何嘗愁枕冷病夫未免待窗明
拂書洗硯竊堂上幽事誰知日有程

閏月辛酉壬戌連日風雨癸亥早晴

殘雨在簷猶點滴斷雲銜日正蒼涼清愁偏向暮年覺
少睡不禁秋夜長簾影漸生禽語樂杵聲初動藥麝香
諸兒作吏俱安否那得藥風至汝傍

予諸子伯叔
李皆出仕

秋思

少日猖狂不自謀，即今垂死更何求。
簡編不隔聖賢面，夢寐時為河嶽遊。
濁酒未傾心已醉，長歌欲發涕先流。
石帆射的煙嵐晚，過雁聲中又一秋。

又

十日秋陰滿徑苔，蓬門那有客敲推。
水邊丹葉已如許，籬下黃花猶未開。
空見遊僧衡嶽去，難逢新雁杜陵來。
溪雲一片閒舒卷，戀著漁磯不肯回。

閒遊

江邊小市舊經過歲月真如東逝波
茶竈酒壚多識面
少留賣藥買漁蓑

又

溪橋偶與僧遊話草市來尋逆旅炊
自笑一生為客慣
捉驢小豎訴朝饑

又

袂除情累煙波上放蕩胸懷詩酒中
禹會橋邊湖落處
夕陽幾度繫孤篷

對鏡

面大如盤七尺身
珥貂自合上麒麟
詩家事業君休問
不獨窮人亦瘦人

幽居書事

老人初起厭囂喧
塵几從教鼠迹存
赤脚平頭俱遣去
倚牆危坐燕朝暾

又

買魚賒酒皆高興
野店溪橋圖畫中
從此衰翁自行耳

不須多事喚蠻童

偶與客話峽中舊遊

我昔旅遊秋雨細建平城東門欲閉主人迎勞語蟬聯
小婦春炊縞衣袂長年三老半醉醒蜀估峽商工算計
須臾燈闇人欲眠泊船卸馱猶相繼山深水嶮近蠻獠
往往居民雜椎髻即今屈指四十年懷抱淒涼真隔世
讀老子次前韻

平生好大忽瑣細焚香讀書戶常閉少年曾預老聃役

晚歲欲挹浮丘袂力探玄門窮衆妙肯學陰謀畫奇計
言狂不獨人共排志大仍憂後難繼君看淡埽出繭眉
豈比一尺春風髻著書勿恤飽蠹魚會有子雲生後世

作辭

生世八十餘日夜迫衰老中年所築舍傾壞當官道每
逢風雨夕性命凜莫保況此蘆竹藩何恃不摧到今朝
手自葺不暇避塗潦雞豚有限隔門巷得鋤埽豈惟禦
盜竊亦足慰懷抱陰雲忽四垂見事幸差早

寓歎

老生讀書百絕編日晏忘食夜廢眠孝經一生行不盡
況有六籍陳吾前華軒玉食非素願廣廈高墉實郵傳
經營歸計笑時人我老但須書數卷

衡門感舊

蒼煙屯不散疋素橫郊原雨細不溼衣著水始見痕躋
躇意自佳未遽掩衡門一一送歸鴉楓林猶未昏念昔
壽州歸紹興初紀元闔門過百口一身今獨存不死實

有命送老三家村躬畊幸得食萬事不足論

客中作

江天雨霽秋光老野氣川雲淨如埽投空飛鳥雜落葉
極目斜陽襯衰草平沙爭渡人鵲立長亭下馬障泥濕
纍纍紅果絡青篾未霜先摘猶酸澀客中雖云貪路程
買薪糴米常畱行茆檐獨坐待僮僕不聞人聲聞磴聲
讀書示子適

我惟苦愛書未始去几案生雖後三代意尚卑兩漢世

衰道術裂年往朋友散澤居貧至骨霜冷衣露肝猶能
樂其樂肯發窮苦歎爾來更可笑身糴兒炊爨一飽輒
欣然弦誦等籬泮望古雖天淵視俗亦冰炭阿適可憐
生相守忘夜旦孤學當世傳歲月不可翫

老懷

老懷常易感秋雨苦難晴羈枕悲歡夢高城長短更榮
枯一螳垤成壞幾棊枰抱疾茅檐下行人肯寄聲

時日
得李

孟達
書

沉繇

沉繇久未平寂莫閉柴荆危葉先霜墜殘螢冒雨明記
書由默誦得食出躬耕此事吾親驗方當告後生

遊近村

行歷茶岡到藥園却從釣瀨入樵村半衰半健意蕭散
不雨不晴天晏溫薯蕷傍籬寒引蔓菖蒲絡石瘦生根
參差燈火茆檐晚童稚相呼正候門

又

被髮行歌雪滿膺夕陽顧影亂鬢鬢乞漿得酒人情好
賣劍買牛農事興社鼓賽秋聞坎坎塢燈照夜望層層
歸來閒指烏藤說箇是人間耐久朋

小亭

除地編茅作小亭一川風露對青冥殘螢欲盡猶穿戶
落葉初飛已滿庭櫟老無心求匠石鬼靈有說拒奴星
餘年默數能多少盡付黃庭兩卷經

記夢

少日飛揚翰墨場
憶會上疏動高皇
寧知老作功名夢
十萬全裝入晉陽

又

老來百事不關身
北陌東阡一幅巾
忽夢行軍太行路
不惟無想亦無因



劍南詩豪卷六十三



總校官庶吉士臣張能照

校對官編修臣裴謙

謄錄監生臣劉銓瑛